

98785

85

詩文徵志

內編 本縣人詩文

250.4

4

部=8

民國昭通縣志稿

卷八

民國昭通縣志稿卷八

第二十三 詩文徵

內編 本縣人詩文

纂修恩安縣志稿原序

乾隆壬午副貢

馬洲

昭通舊號烏蒙原隸蜀境自雍正八年以逆酋悖叛皇師討平改建城池固巖疆重地也則凡天時地利人事之因革損益文獻攸關必於志焉得之雖通志已錄其略迄今四十餘載猶無郡志欣逢賢太守汪公署莅此邦憂事久失傳慨然以修志爲急暨五屬同寅諸君詳請上憲深蒙嘉允誠邊疆幸事也洲以異鄉寄籍之人獲與分修之列自愧庸陋渺無

昭通縣志稿

卷八

詩文徵

昭通新民書局代印

見聞惟念居其地而不克綜覽其典籍儒生之羞也遇盛世而無以黼黻乎皇猷臣子之過也夫志者何誌其事以出治道也易曰立天之道惟陰與陽立地之道惟柔與剛立人之道惟仁與義統三才而共貫之自古帝王卿相修齊治平無以外此欲外此而言志何所志乎昔朱晦翁歷任浙江閩海隨在必有志非以資博洽而託空言固將灼前聞而見之行事俾後人因志所載反而求之究理亂之原謹苞桑之戒若者因何而興若者因何而廢與其翻閱陳案而難稽莫若展卷披吟而易見所以登戶口實財賦同風俗興學校振兵防善善惡惡培爾元氣固爾邦本是志者意也夫昭自成平後

四方來集並土著夷民生齒日繁戶口不虞其寥落惟缺於
泉源兼以山多田少故財賦難增即今城內軍民汲飲之水
歷二十餘里自龍洞引入鑿池資用每年春夏之交時憂匱
乏此昭郡第一要策也至於兵防查郡屬土司夷目消滅殆
盡經前治憲鄂公奏請安鎮設營基布星羅永無內變而界
接川黔正虞關隘之處防範不周此昭郡第二要策也誠握
其要而圖之於以隆學校而作人才化刁頑而同風俗忠臣
孝子之志由此奮興五袴兩歧之歌無難再詠屬在邊境可
媿中州後之官茲土者由舊更新因時制宜無負聖天子拓
土開疆之意柔遠能邇之懷固我賢太守諸君之所厚望也

昭通縣志稿

卷八

詩文徵

二

昭通新民書局代印

則此志非萬事之所永賴者哉

鄒節母楊太孺人墓志銘

乾隆壬子
經魁

魏定一

太孺人楊氏威甯守備鄒公學仁繼室貴筑訓導楊公夢松
女也孺人幼具端嚴之概父母奇之曰此女其光吾門者乎
甫四歲父母俱亡戚屬危氏撫之年十四歸於鄒事夫子甚
敬以不及事翁姑爲恨每至諱日及春秋祭必虔備祭物無
稍怠凡衣食起居又無非儀敬昭婦德初鄒公謂孺人曰吾
從事武職雖能剔林莽息奸盜通商旅輯流氓直事上官忠
報朝廷而髮且種種有子而不澤以詩書恐非所以善後也
乃辭官徙家昭郡時長子國翰遽殤有子國文及女四居久

之值昭水災家幾燼客爲謀曰賣其奴婢四人稍可以生公
與孺人皆以爲不可賣人以養人第窘於計惟縱此輩嫁耳
遂縱之而孺人躬執炊勤紡績種蔬養畜備極艱苦及夫卒
喪葬悉遵禮制是時孺人年方廿五其子四歲孺人幾不欲
生即轉念曰人以孤付我我死即死耳其如人禋祀何乃飲
泣撫子至七齡使就傅繼而家益窘母欲其子夜讀書交易
權爲生活計詎子與市中子弟嬉遊孺人自責曰是吾過也
繼之以泣乃更使就遠鄉讀筆札膏火費皆以針黹紡績佐
之歸則述先人志行及已勤勞惕之嘻憊矣由是子益學入
郡庠學使郭公給孺人匾額人以爲稍慰矣而孺人益勵其

昭通縣志稿

卷八

詩文徵

三

昭通新民書局代印

子鬻釵環命赴五華書院肄業五載鄉試屢薦未售乾隆五
十年詔舉苦節紳耆具呈請旌孺人聞之謂其子曰焉用文
之但得汝世世子孫知忠孝節義爲生人之常吾願已足不
然稍有非爲玷此坊多矣子聞命欲辭而狀已投遂奉旨旌
表建坊日適值孺人壽親友以節壽賀孺人泣曰吾始願不
及此但願鄒氏不殄禋祀於是教子愈嚴待諸孫亦不寬假
子國文庠生長孫焯次炳三炤俱舉人四娘業儒諸孫將次
第成立皆孺人所畱貽也以嘉慶丙辰年四月卒年六十有
七葬於郡南山之陽銘曰 鳳詔龍章 玉宇金相 皎皎
冰雪 垂元石以彌光 山蒼蒼 水洋洋 旣清且長

剿撫論

道光丙戌翰林 辛聯璋

自古用兵不過剿撫兩端剿以嚴首惡之誅而罰無可宥撫以安脅從之侶而情有可原撫先以剿除暴所以安良勦繼以撫畏威使之懷德言勦而不言撫則誅而不勝誅意固近於殘忍言撫而不言剿則亂愈滋亂患更失之優柔此剿與撫有偏持之弊也且勦以爲撫之地震以雷霆而其心不敢二撫以抄勦之施散其黨衆而其勢乃益孤此勦與撫有相濟之功也然而勦亦難言矣古之善用兵者臨事而懼好謀而成強弱之勢分勝負之機決是以戰則勝攻則克而師不挫衄否則急躁者失在粗疏慎重者患在畏葸且曠日持久

昭通縣志稿

卷八

詩文徵

四

昭通新民書局代印

師旅無功加賦橫征脂膏已竭如是者病國撫亦未易言也昔武侯之征蠻也七擒七縱必使之帖然誠服而後俯首跪請曰南人不復反矣否則威不足以惕其志則養癰貽患未絕根株德不足以結其心則朝盟夕寒類多反側如明季流寇當事者托言招撫不旋踵即叛去可爲殷鑒滇省之患患在始可剿而誤言撫三年馬二花之亂明參將聞變即帶兵往中賊計受傷死賊據烏龍經兵練兜圍竄入尋邑吳制軍親帶兵往攻復調威甯鎮兵同勦賊勢蹙復返東川時兵精糧足且亂止一隅如使大伸天討窮究黨惡盜有所懼自不敢復萌異志顧乃急於了事僅以馬二花正法餘概置弗問

回衆始無畏志招撫後其事益橫人皆知其不久必亂至五年捷洶厥果亂汪太守親往撫之回詐言解散燒殺如故不得已給以路費賊首予與重金其衆始散夫強寇在境不費一兵不折一矢其圍即解計似爲得而回衆以燒殺爲利藪此和彼竄六詔始無甯宇其始官自爲籌費其後派之民間而地方乃病且利之所在其始不過近地之回後則遠方之回皆至又其後夷衆從而附和吳督爲之奔走而賊乃不可制至省城被圍民人塗炭恆制府目擊心傷初悔悞聽人言雉經而死雖其才不足其志可哀猶愈於恬不知羞而偷生人世者此撫之不善始固然也吳制軍自川帶餉數萬兵千

昭通縣志稿

卷八

詩文徵

五

昭通新民書局代印

餘人數月初抵滇境回人阻其要路退至宣威由小道潛至曲靖委汪東道至省議和許割城內外街分界與回回暫退而武定全城被屠壅不上聞方且議敍多員越次升遷自知才不勝任告病以卸其肩張制軍素悉回匪之奸詐身受回匪之陵虐誓滅此而朝食四路紛紛使勦而委任非人餉多虛糜師多敗亡此勦之不善又有然也繼而胸無定見忽剿忽撫朝令夕更至楚雄失守麗江又失各州縣以次皆失警報日至復委鄧方伯暨各員議和一切悉如前約許以貢院駐紮回兵於是民間哭聲大震擁至督轅哀訴如期回人衷甲入月城城初閉省垣之不失賴有天幸衆練憤甚欲盡殺

議和者張制軍遂告病卸事此皆封疆大臣身受重恩平時所稱才智兼人者事難則退明哲保身自當如是耶合而觀之前此之撫爲失計後此之勦亦未得計豈勦與撫皆不可行歟抑勦與撫之外別有良策歟而非也蓋勦以濟撫撫以濟勦不得是勦而非撫是撫而非勦也時可勦則勦時可撫則撫非勦之不能而始言撫撫之不能而始言勦也若勦非能勦撫非能撫襲勦撫之名而不善用之不得以勦撫之不善而並咎勦與撫之皆非也有治人無治法因作勦撫論

上兩湖總制李宮保書

同治癸酉經魁

李開仁 樂山

竊聞能立天下之大功者必有安天下之大計有安天下之

昭通縣志稿

卷八

詩文徵

六

昭通新民書局代印

大計者必能顧天下之大局是以一夫不獲時予之辜一隅未安引爲己責千古帝臣王佐其用心蓋如此其至也仰維明公望隆韓范智軼良平應五百年名世之生副億萬輩蒼生之望誓師江淮殄滅巨寇鼓行而北削平醜虜能立不朽之功斯受非常之賜位臻極品寵冠百僚卓哉弗可及也方今南北肅清惟西南半壁尙關睿慮去秋伏讀上諭首派左宮保督辦陝甘軍務而滇省僻在邊陲前以中原未靖遂使回逆縱畱其間延至丁卯初冬回逆長驅直逼省垣至今未解署提憲馬公嬰城固守翦除內應人始安適岑中丞克復豬拱箐提兵往援獨當一面東方一帶始通糧道乘勝復呈

貢晉寧現圍昆陽惜腹背受敵動若掣肘進則賊如蝟毛倉卒未易成功退則乘勢掩殺首尾不能相顧是時劉制府已抵曲靖楚雄三井盡爲賊據鹽課無出惟大關鹽井渡所設釐局每歲約抽厘十餘萬兩分解督撫而中丞所帶練丁按月每人支領五六錢奮勇者不過一兩其所恃以不變者惟此忠義之氣固結人心而已然猶灑涕撫膺躬先陷陣士卒無不感憤捐軀所向輒靡當此之時苟有大軍巨饗從旁接應則衆賊胆落慮無百戰百勝況乃殊勛偉烈赫赫人望居中調遣有如明公者乎明公以以韓范之才運良平之智立大功定大計必能顧大局必不令一夫一隅棄置度外現今

昭通縣志稿

卷八

詩文徵

七

昭通新民書局代印

節制兩湖滇黔軍務得以便宜行事此天賜滇民以來蘇之望也京職適因請假回籍由樊城迂道至漢恭候憲轅爲民請命祇以滇省被圍一載有餘無兵無餉危在旦夕若不及時進剿萬一省城不守蜀中必然震動將來牽連陝甘火勢燎原斷難撲滅明公撥亂反正天下大勢如指諸掌誠假某馳檄赴滇預作聲援或委解軍需稍爲接濟某雖駑鈍願受馳策然後籌辦鉅餉調遣良將統帶長勝軍若干由巴江逆流而上於昭通取齊招募本省練丁以爲鄉導分兵兩路一由東川直抵武元會同統帶楊先取楚雄阻其歸路一由曲靖楊林直抵省垣會同撫軍岑兩面夾攻一面移知川督駐兵

會理防其奔竄如此則回逆望風先遁四方兜剿勢如破竹
席捲而西分別勦撫不出二年渠魁授首矣此所謂能顧天
下之大局者必能立大功定大計於不朽也非明公誰克當
之謹陳管見是否有當伏乞垂鑒

戎城再上李宮保書

時合淝以
欽差至川

李開仁

竊爲勳明爲氣運所關非其時則動有奇禍治化與經綸相
待非其人則難與圖成是以智者必相時而動至道須待人
而行蓋過此則難爲功而得人則易爲理也孔孟有治天下
之德而無其位諸葛有安天下之才而無其時子房運籌帷
幄決勝千里可謂智矣而統衆行師攻城定地之略或遜淮

昭通縣志稿

卷八

詩文徵

八

昭通新民書局代印

陰韓范出入將相功德兼隆亦云盛矣而經略西夏之外未
聞殊績郭汾陽再造唐室功蓋天下而相州之潰幾於一蹶
不振岳武穆志存匡宋氣吞醜虜而朱仙一戰遽爾班師然
則得位乘時立功建業學孔孟之學心諸葛之心智如子房
望隆韓范有汾陽武穆之奇勳無宦豎權奸之壅蔽伊古以
來誰有如明公之盛者哉明公以天下爲己任天下之所以
望公與所以副天下之望者日起而不窮苟舉天下之大而
有一民尺土未被其澤推明公之心必有大不安者豈惟弗
安必將拔諸水火登諸衽席不忍聽其塗炭糜爛而至於莫
可救也然則滇民之待救於明公而望若雲霓者今其時矣

頃南北肅清惟陝甘雲貴尙梗王化論者謂治兵大勢由近及遠宜先定陝甘次撫黔疆次平滇境愚竊以爲三省鼠賊其志不過殺戮焚擄而已不足憂也夫干戈以討有罪而罪判重輕撻伐以奏膚功而功分難易今之杜汶秀無異昔之洪秀全僭號改制則罪不容誅據城戕官則法無可貸肆其爪牙直困省垣殺戮之慘天日無光神人之所共憤覆載之所不容舍此不誅更誅何人置此不剿更剿何地而議者乃徒較封疆之大小忘判竊之巨魁戒途於啞人之虎而漏網於吞舟之魚豈不謬哉且今之滇省乃川廣之屏障非如玉斧畫河此外非吾土之時也臥榻之側任人鼾睡有是理耶

昭通縣志稿

卷八

詩文徵

九

昭通新民書局代印

杜逆抗命西鄙歷有年所向以中原多故久稽天誅其所憑恃非畏威脅衆即偷生苟活故岑中丞提數萬疲困之卒當數十萬豺虎之衆非有雄兵鉅餉從旁接應也徒以忠義感激固結人心猶然摧堅陷銳所向披靡豈非經綸氣運有開必先遲之又久以待名世之大人而收功於垂成者耶甚矣明公之將有大造於南土也今天不遺滇民俾明公銜命入川滇省軍務必有便宜籌辦之旨而又適當省圍旣解之後此天降大任於明公而故畱此不朽之功業鄭重以相須也請將滇省現在情形敬爲明公陳之雲南額設十四府五廳三直隸州分隸三迤惟迤西版圖最寬西道所轄大楚永景

順麗蒙永等處方廣四千餘里負山阻險地控極邊盡爲杜
逆所據近日楚雄三井已爲岑撫軍遣將克復其餘府縣尙
淪異域此迤西一帶之情形也南道所轄普鎮元臨等處有
署臨元鎮梁士美嬰城固守迄今十餘年士民一心素稱勁
旅元江地多煙瘴普洱地濱車緬以此得全而鎮沅附近景
東遂併於賊此迤南一帶之情形也東道所轄曲廣開東澂
廣昭通等處惟澂江一府附賊曲靖自馬連陞伏誅餘黨盡
歸尋甸開東兩廣素鮮回民雖有竊發亦易爲力衆而且強
者其爲昭通乎昭通乃滇蜀之通衢故大關鹽井渡向設釐
局以商賈往來必由此道也回民之多不下萬餘家其爲首

昭通縣志稿

卷八

詩文徵

十一

昭通新民書局代印

者悉受杜逆封號自構釁以來附近漢民房產盡皆霸佔條
糧地丁概不上納官府莫之敢問回西李本忠阮雲忠鎖三
等擅設厘局卡房焚殺奸淫種種不法難以枚舉曩者鎖三
乘機煽動經前署總兵楊盛宗勦辦正法李本忠狡詐求撫
立功迤西兵至定遠公然與馬鳳等開城賣降遂令西逆猖
獗長驅圍省按律定罪百身莫贖今歲三月提督唐友耕統
師援滇兵抵昭城彼已陰受杜逆僞詔糾衆堵截是時唐軍
門欲迂道赴援則四面皆賊昭圍且不能解何況省圍將進
兵攻剿萬一省城有失則援兵不至罪有攸歸延至九月督
撫始令相機剿辦遂由龍洞汎進兵連破賊營二十餘座兵

抵八仙營餘黨畏罪投誠者千二百餘家近攻魯甸所屬巖洞岩洞乃賊首李之巢穴兵練鄉團四面雲集指日就擒昭通既平川滇大通矣此迤東一帶之情形也省城附近十一州縣經岑撫軍馬提憲日夕攻打陸續克復大兵進攻激江激江既得即可併力向西撥亂世而反之正此其時也明公以旋乾轉坤之才運澄機觀變之識當此之時若能籌辦鉅餉按臨滇界指揮諸將授以方略檄委唐軍門統帶援師由昭曲楚雄直取定遠檄委署臨元鎮梁統帶迤南兵練由元江鎮沅進兵控扼其上一面移知岑中丞馬提憲火速攻取激江新興等處統領大軍分道進剿使彼首尾不能相顧一面移知川督駐兵會

昭通縣志稿

卷八

詩文徵

十一

昭通新民書局代印

理防其奔竄乘勢進取永北絕其歸路誠如此則諸路兵甲雲屯霧布杜逆雖強剋期授首矣然後以得勝之兵先平黔匪次定陝甘非常之功萬世一時夫國家大計小臣何敢與聞第以桑梓情深故敢妄爲揣度明知明公入川別有密詔顧朝廷縱未嘗有其事而小臣究不妨存此心即或事有專責任難旁貸籲懇仁恩於回京面聖之時希將滇省現在情形據實陳奏明公爲民請命自可造福一方而全滇人民已沐更生之慶矣仁末學新進罔識忌諱干冒尊嚴無任激切之至

李孝子瑯章墓誌銘

李開仁

公姓李氏諱璿章字斐然壘泉公之長子也原籍山左遠祖仕民爲指揮使官黔厥後遷于滇之烏蒙世爲郡吏年甫冠充戶科經承公性孝友內外無間言節母李氏其配也生子三振杰振森振昌女二皆幼素患弱疾於道光二十七年卒春秋三十有六附葬先塋閱二十五年其長子振杰始克表於其阡求銘於予節母乃泣謂振杰曰吁子來前汝欲揚爾父汝知爾父之爲人乎吾之所以矢志靡他蹈死而不悔者非爲汝等計爲汝父之孝行純篤而天反厄之以壽此吾所以耿耿至今而莫能自解者也然天道莫測安見純孝之子其後不昌耶吾又知汝等必能自立故含辛茹藥安之若素

昭通縣志稿

卷八

詩文徵

十二

昭通新民書局代印

焉今老矣行將就木不爾告竊恐乃父之目不瞑也自我爲子家婦稔知爾父行先大母呂氏染沈疴諸醫斂手爾父焚香告天剖左臂肉調羹以進病尋愈爾父因之血氣大虧體遂羸弱卒不起家中人無知之者即彼都人士亦無從而表揚之者爾今將丐墓誌其勿忘乃父之孝烏呼公眞純孝矣哉今之人子其中心鮮深愛孺慕之誠其平居昧竭力無方之義一旦遇親有疾如秦人視越人之肥瘠忽焉不加欣戚于其心此卽拔一毛而利其親猶且忍而不爲而况割裂其肢體乎昔鄆人之論謂毀傷滅絕黷政妨義不可以訓後人揚其說不變夫死生呼吸之際而能剜已之肉療親之疾幸

而兩利俱存所謂惟德動天至誠感神也不幸而忘身殞命則理得而心安譬諸金滕納册願以身代之義君子無譏焉而論者徒拘守身之常援會典之文以求解免之路則將以剖心者爲不忠刎頸者爲不義耶何以處夫急難危亡而雍容觀望束手待斃者也春秋載許世子止不嘗藥聖人斷之曰弑夫不嘗藥細故也而加以殺父之名何哉蓋親當病革死生判于俄頃藥之甘苦寒涼以病之寒熱虛實爭辦毫釐一藥誤投亡可立待爲人子者方戰兢保護之不暇顧乃視同行路付之不校此雖無殺父之實而實有死父之心故聖人誅其心而書之曰弑非已甚也然則不嘗藥而蒙首惡之

昭通縣志稿

卷八

詩文徵

十三

昭通新民書局代印

誅與刳臂而起不瘳之疾其性情之相去豈特霄壤哉吾知聖人復起未有不以公爲純孝者也今事更數十餘年而聲稱之湮沒吾懼夫天下後世之逆倫傷化者接踵起也故特表而出之俾振杰勒諸貞珉以垂永久庶幾世世子孫無忘先德焉烏呼非母之節無以彰公之孝而非公之孝亦無以成母之節後之君子採其孝行請于朝而旌焉可也銘曰鳳山之陽龍水之濱天佑望族生此完人恭惟鞠養無忝所生二豎感夢母病呻吟豈無魚笱不如肉羹孝子念之剜臂療親親疾既愈追恤厥身綱維名教坊表人倫粹然孝節鍾于一門

趙公墓誌銘

副將楊

斌墓雲

公諱士美號錫珍昭通人西鄉世族也幼業儒嘉慶二十三年入營食糧精騎射考拔中營外委歷補千把總出師著績升威遠守備擢順雲協都司曾兩次入覲於咸豐元年回任繼升龍陵協未赴八年春迤西杜汶秀飭大股圍攻緬寧維時全滇糜爛滿地烽烟緬寧地極西邊乏外援糧餉又匱公登陴督守城旣陷巷戰陣亡同時死難者公妾冷氏與孫三人長文炳次文蔚文朗事聞大府奏請廕卹如例初公蒙難時部兵感公知遇收其屍裝殮厝於緬之北郊當其赴任子大輝未同往居家務農咸豐六年冬昭郡回變大輝練團保

昭通縣志稿

卷八

詩文徵

十四

昭通新民書局代印

境臘月二十日大股回竄荷花塘燒殺居民大輝首先犯敵登時戰歿其家數年未得公耗及緬寧克復公子媳李氏知之赴省領卹銀欲至緬搬柩不期病沒其事遂寢後公之九女適周氏者時孀居痛父骸不歸苦乏貲斧乃典質簪珥奔省訴諸當道值公故同寅順寧太守崔公子小江擢臬篆悉公生平憐其死代求上臺給勘合路資其女亦不憚千里跋涉備歷艱險至緬得柩開棺俯視計沒時已十餘春秋而面目如生烏呼公之忠於國也可徵矣其子若孫並死難可謂忠蓋萃於一門矣然微此孝女幾於忠骸難歸故土彼蒼者天善人是佑公厝於光緒二年夏到昭女擇族孫文富襲廕

卽於本年十月安葬公於故里窀穸既就石椁未辦女復百計經營清理舊產乃得爲公起墓徵誌於余烏呼公之得附首邱蓋始終得力於此女也前郡伯吳和菴旌公之女閭曰純孝苦節以勵鄉里固其宜也公生二子九女嗣孫文富已故其子明芳嗣襲是爲序銘曰唯公之生銳志廊廟勵行砥節曰忠曰孝迺際時艱小醜滋跳忠蓋一門身殉城邈哲嗣捐軀桑梓冀保孀女歷艱窀穸完好烏呼哀哉可旌可表

呂靜齋先生德教碑

光緒庚辰進士

謝文翹

秀山

先生諱清字靜齋昭通人也仁厚中正孝友慈恭九德兼資百行修飭若夫砥節礪行樂道好學研極羣經探索百氏于

昭通縣志稿

卷八

詩文徵

十五

昭通新民書局代印

時承學之士景附者衆若山之仰泰岱飛走之宗麟鳳也舉道光丁酉鄉試第二不得志春官大挑雲南縣訓導奉諱家居掌教鳳池書院循循善誘多所裁成以知縣截取不就再選東川教授德爲士程文爲時範太守重之兼主西林書院調鎮沅教授引疾歸昭學者益進恩義學行春秋兩試門下咸多捷者東川入版圖二百餘年舉賢書纔十數人自先生在西林後六七年間出先生門得售者已三十人以上甚而於鄉黨益欽其教尤以敦本飭行爲要德務中庸道趨正直從遊者成就皆可觀紳佩之徒深以不及門爲恥光緒四年甲辰八月卒享年七旬有八門人咸深悲悼罔有止極乃追

維先生德教謀所以顯於無窮者焉用是昭銘景行刊諸不朽其他懿德善行具載志乘茲不具錄其辭曰
鬱律昭陽廓自雍正炙淑斯鍾是生仁聖於維先生實啟斯文宮廟美富宗匠陶鈞山頽梁壞來者曷循爰勒貞珉以揚德教吁嗟來茲永世則效

重修善堂碑記

謝文翹

昭通既置郡將士之勘定烏蒙者多畱占籍地闢民聚黔蜀楚越之人頒斌戾止受塵爲氓賢長官慮其自爲風俗也迺遵會典酌時宜定冠婚喪祭之禮豐不踰制儉不戾俗吉凶慶弔牲幣酒饌之盛戚近而家富則常相往來或限於寒則

昭通縣志稿

卷八

詩文徵

十六

昭通新民書局代印

視財力能及以錢或銀釀少以增多無貴賤貧富事籍以辦寢成風俗百餘年號爲醇樸泊軍興儒業大衰從戎服賈者走四方挾微費還習覩浮靡漸入奢華淺薄之徒怙侈滅義禮俗日敗壞流失一二薦紳立鄉規蘄返樸還淳而不可得丁未冬余猶守鎮遠內子卒官署越歲移柩貴陽其夏命次子崇圻扶柩歸里臨行受事全念鄉黨貧約欲辭賻長子垣請曰大人恆病俗易奢吾鄉禮質名賻實奠故家遺俗未或改也受以帳其乏不兩便乎又踰年余歸旣營窀穸歲除矣計所受障四百許分之三黨作遺念朱提數十市雜糧饋貧餓者此外時銅三百餘貫私念區區者無能爲役郡北關有

廣仁堂東爲養濟院久圯夷遂浼王勳臣馬斐然葺治之俾可棲止不足又益之百金於是兩所各數十楹咸與維新即以餘貲治墟墓間壞道暨犀角寨並碑田石橋之斷者工告訖兩君請記顛末余曰是不足記也雖然相俗之敝亟矣停澆激薄誰不如我因溯賢長官善俗之原以諗夫鄉人之富而好禮者

重修恩波樓記

丙戌進士 謝崇基 履莊

歲癸卯同里諸君子作城南恩波樓成既清於太守張公爲之記矣復以屬余其言曰斯樓之爲沈公創建其有惠政於吾昭記之固也雖有未備焉者願吾子賡而續之昭云來茲

昭通縣志稿

卷八

詩文徵

十七

昭通新民書局代印

幸甚余辭不獲謹按是樓爲吾郡八景之一載在志乘當夫良辰淑景觀山水之清幽有花木之成陰點綴近郊蔚然深秀邦人士暇日讌游於茲誠有如太守所云然者其始作於乾隆庚辰制府愛公適至落其成以樓前瀦水爲渠汪若巨浸名之曰恩波中歷百有餘年逮咸豐初毀於兵火距今又五十年矣比歲郡之官若紳輒議復修未果楊君履恆者忱爽尙義之士而託迹於闔閭者闔也以其先世有志於斯而未逮適李君耀廷捐貲爲倡偕同志商諸余且請於官釀金壹千玖百餘金毅然以庀材鳩工爲已任余力贊成之經始於光緒二十九年四月凡期月而工訖因舊址而增高旁更爲

房三楹作長垣以繞之爲來遊者雅集之所又樓之東西有橋二翼之以亭蓋規撫之宏整有突過前人者余因思夫自來勝地名區之有興作者多矣而或成焉以否則悉視其人之所爲今諸君子之作斯樓經營慘淡不遺餘力一任毀譽之交乘卒能不怨憚勞以歲厥事所謂有志竟成者非耶抑余尤願後之賢父母與夫吾郡之有心於桑梓者善繼前徽恢張而倍護之俾斯樓之興永永無替則吾郡文物之蕃盛氣象之光昌必有日上蒸蒸者豈徒在播一時之美談侈遊賞之觀聽已哉若夫捐資董事諸君姓氏營建壹是款目當別爲一時并志弗諼不復覲縷云

昭通縣志稿

卷八

詩文徵

十八

昭通新民書局代印

蕭錫之先生德教碑

謝崇基

錫之先生既卒之明年歲在癸卯嘉平之月門下士咸集師門爲文而祭禮畢追維教思若不勝悲悼者然僉謂吾師德行道藝親炙者亦既稔知鑿聞然無以表章之則多歷年所有泯沒滋懼者矣曷謀所以不朽者謹按先生諱維祺字錫之恩安蕭氏淵懿朴茂仁恕謙謹內行完粹有本有文逮爲諸生淹通經訓旁及子史靡不兼綜條貫學者宗之若泰山北斗既連不得志於鄉科以經明行修爲歲貢生例得訓導候選先生謂窮達有命益冥心孤往奮然於有用之學爲文則根柢經術原本儒先扶植理道不苟爲炳炳琅琅趨時之

作有司聞先生名禮聘主講郡育英書院四方弟子益進後及門者殆千餘人掇巍科取高第以文行名者指不勝屈先生善誘不倦數十年如一日識者比之宋胡安定之教授湖州云以光緒二十八年十二月十五日卒春秋六十有二惟先生德教感人之深也於是相與刊石紀辭俾至行令聞久而彌新即以慰吾黨門下士之思焉乃爲銘曰
德足以範世勵俗而聲稱不出乎梓鄉學足以信今傳後而文字屢蹟於名場惟本身以示教作學子之津梁於戲先生教澤銘貞石以垂後庶永永其勿忘

耿孝子傳

謝崇基

昭通縣志稿

卷八

詩文徵

十九

昭通新民書局代印

孝子姓耿氏繼志其名雲南恩安人邑處士開忠之次子也生三歲即失怙母錢氏矢志撫孤年十二值母病孝子事奉惟謹衣不解帶目不交睫者累也疾劇則中夜痛哭籲諸神祈以身代復念古人有割股肉以愈親恙者因效之和藥以進疾遂瘳母中年患目翳孝子常左右之自臥起至飲食溺便皆躬自扶掖一身而百役靡不爲也如是者四十餘年母目爲之復明髮白者轉黑又三十餘年而母歿喪葬一切悉能如禮以母之鳩杖爲木主供奉依依孺慕遇忌日或佳辰輒兩泣孝子生平持躬敬謹不讀書而能行與古合家故清貧而自守極堅與世無競終其身無一字入公門娶張氏亦

能承孝子意克盡婦道里黨咸無間言孝子卒後有司上其
狀請旌得旨俞允而孝子之母苦節疆吏先已彙奏於是節
母孝子同被旌命下日邦人莫不咨嗟歎羨嘖嘖稱道焉子
四人存光歲貢生候選教諭存寬光緒壬午科舉人揀選知
縣論曰觀孝子子取功名如拾芥人咸以達人有後爲孝感
所致理固然也而不知其兄弟怡怡綽有父風尤家之肥矧
其先固有苦節可貞之母哉烏呼所由來者遠矣

誥授武顯將軍楊公墓表

謝崇基

公諱斌字慕雲晚號蟠叟先代江西撫州籍明初始祖渭公
以指揮征滇卜居激江碌冲世業儒四世祖昆季五人均領

昭通縣志稿

卷八

詩文徵

二十一

昭通新民書局代印

鄉荐有司題曰五桂天香高祖保乾隆中副車祖維山邑庠
遊學至昭教授大關永善間以子竹齋封翁入鎮轅文案始
居郡城有子二公仲也生十三齡而孤封翁在幕久德望素
著長老咸稱之及歿家無長物公奮志力學丙辰回亂鎮標
兵早奉調黔粵乃募軍防禦公率勇奮鬪賊屢瀕于危長姊
謀曰亂事如此吏匿不上聞雖有功不賞今黔帥巴公與先
君有舊盍往依之公時未冠遂赴黔謁巴對墀軍門參贊戎
機剿都勻等處終因胞叔長兄均莅戎行家無餘丁還里仍
就鎮轅文案時郡屬賊氛甚熾巴蠻頻年過江騷擾右營主
將死者屢矣公首倡防禦之策其患漸紓髮匪大股由永竄

入以各路伏兵截堵不敢犯城此公居中擘畫之力也後從軍征永北尋甸師旋隨平魯甸黑石凹逆賊綜績歷年戰功荐保至花翎副將銜補用遊擊始以親老不能遠離故補本城中軍守備異數也旋與當道不合因之解組至蜀適川軍有事階州遂奉調留川補用尋雷波蠻出巢提督李統兵進剿以公夙諳邊務命爲鄉導公奮勇直前後以撫班師晉副將加克勇巴圖魯勇號隨歸老不出公揚休玉色聰慧絕倫篆隸丹青奕刻音律皆精性剛嚴居家孝友喜賓客有孔北海之風長姊矢志奉親公事之謹及老邑令具狀得旨旌表貞孝建坊入祠昭土瘠貧鮮林業公前遊川見其民富因務

昭通縣志稿

卷八

詩文徵

二十一

昭通新民書局代印

蠶桑乃編書教鄉人以種養之法偕同志訂婚喪儀務崇朴實蓋公之議地方事必規畫久遠其大旨類如此教子嚴而有方故多成就晚尤好班馬史手不釋卷兼以書畫自娛嘗謂曰讀書教子之樂云初配陳夫人早卒繼配戴夫人生子某某筵室趙夫人生子某皆先公歿合葬鐵鑪山再娶謝無出丁夫人生子某女三孫九人崇基忝處至戚備知梗概因撮公家世而敘其大凡以刊諸貞珉是爲序

恩安王氏四節烈徵文詩啟

己丑 舉人王正觀伯瞻

懿夫貞操勵志美固播乎千秋義烈捐軀芳宜流於百世是以竹染湘妃之淚點點皆斑城摧杞婦之悲聲聲墮堞屢標

彤管爰壽青編自昔揚芬於今紀烈顧爲坤旌留正氣誓節
行之獨全而以公道在人心冀轡軒之下採如恩安王氏四
節烈者誠閨中之奇節闔內之堅貞矣原隸江寧徙居寶甸
家誠望族代有名媛娣姒同心貞能全於白首祖孫合德志
皆矢於青年有志竟成徑情自遂慟所天之既逝身等銖輕
悲搶地以徒號腸幾寸斷或則翁姑健在勉爲未亡之人或
則子女多殤了無存孤之責返魂無術心同石爛海枯就義
不回人是冰寒玉潔情更深於化石事有類於摩笄茹苦含
辛五十年儼如一日絕粒飲鳩一再傳又見斯人二美具臻
四難斯並貞烈節孝萃聚一門闡發幽潛芬留千古所謂巾
幘鬢眉者非與他日者史臣採訪憲典旌揚日煥絲綸雲標
綽楔永播芳徽之式長留筠管之馨斯誠榮與有足述矣所
冀詞壇碩彥藝苑名賢學富五車詞傾三峽或毫承乎彩露
或紙拂乎仙霞藉題詠或紀載於文人以章明乎幼婦蜀牋十
樣乞即緘魚女史一編補來大雅

曹烈婦墓志銘

署瀘定
縣知事饒起敬

烈婦爲李公本榮女其家素封待若掌珠于歸曹門椎髻布
衣操作而前絕無紈綺氣習性婉婉與成之世兄琴瑟甚篤
門內外不聞詬誶聲丙午臘月成之病傷寒卒婦旦夕號泣
欲以身殉以有妊故未果丁未三月初三日遺腹子渥光生

昭通縣志稿

卷八

詩文徵

二十二

昭通新民書局代印

遂閉口不食至三月十二日絕粒而歿四月長子二喜死七月女保珍夭冬月翁故夫烈婦當夫死之日慷慨自裁烈矣於宗嗣尙無關輕重乃烈婦於生娩之後絕食而死死之一月長子繼夭遂使成之有此一綫之延其有功於曹氏爲何如哉烈而且賢可以傳已爲之銘曰

烈士殉名兮烈婦殉夫其事雖異兮其志不殊痛夫子之云亡兮欲相從於幽都念蚌腹之孕珠兮腸九迴以躊躇晝夜號哭泣血剝膚椎心裂膽生此藐孤上可以承宗支兮下可對夫君子冥途噫嘻悲夫子生兮母死母死兮不負厥初烏呼非從容就義者能如斯乎

昭通縣志稿

卷八

詩文徵

二十三

昭通新民書局代印

節孝朱母張孺人傳

孺人姓張氏父明陸良籍前任昭通守備遂家焉娶郡紳黃翰屏胞妹生三女長適瀘西張保和三適大關吳良桐孺人居次幼聰慧誦習詩書嘗讀女誡烈女傳得古賢媛立身之道父母老無子視若掌珍年十七歸本郡朱孝廉超伉儷甚篤事翁姑孝處叔妹和姑黃前卒惟嫡姑在堂孺人奉養惟謹孝廉頻年北上家計悉孺人支持至壬辰歲館于瀘西張氏姊來迎母欲孺人偕去堅持不允謂姑老無人服侍爲辭逾年孝廉歸以病卒孺人年二十四矢志守節姑歿喪葬如禮兩叔漸長爲授室遭歲饑房產多變易時境遇愈迫不能

相處念母老孀居室無他人因往依之孝養一如其姑焉孺人長身玉立舉止端莊寡言笑謹出入日夕惟事女紅并觀書作字焉其心仁慈善撫幼稚動講禮法吳妹之子女均自幼來昭皆承其教育待奴婢多恩有願侍以終身者洎夫弟生男當爲冢子後即於襁褓中過房撫養命名朝綱現十六歲已議婚習商矣而孺人猶未釋然也每痛母家無人乃商之親族願以張氏遺資千餘金贖回前售出之房及他產業以朝綱兼祧兩姓宗異日生子以一姓張承其香烟使春秋拜掃有人庶免久而忘本已呈有司存案吾知朝綱當不負孺人之苦心也余前纂昭通志書曾載孺人于節婦中今又

昭通縣志稿

卷八

詩文徵

二十四

昭通新民書局代印

三年矣現精神尙強行見爲子授室含飴弄孫以享天倫之樂耳朝綱余門人嘗詳述其母之事實祈爲文彰之爰廣其辭云爾

論曰曩中國人動言女子無才便是德故女學鮮深造昭城閨秀尤寥寥民國初創設女學校及蠶桑學堂當道以孺人有學行屢延爲校長俱不就其品概爲何如哉矧其節勵冰霜操堅金石奉兩母以終天年至皓首全貞苦心立嗣旣彌伯道之缺憾更免若敖之餒而可謂孝思不匱永錫爾類矣烏呼若孺人之行誼豈非巾幗中完人歟吾中國女界可不奉爲模範也夫丙寅冬月楊履乾撰

楊孺人陶氏傳

署普洱道尹 蕭瑞麟 石齋

孺人陶氏西鄉舊圃大姓父開科生三子弟鴻燾聲尤著氏年二十適楊千戎楨字次子緒之逾年生子樹勳緒之忽遭疾不起弔者皆謂綺歲孀也醮之便緒之有前母兄亮臣尤謹之孺人聞言初欲殉繼以姑老子幼無所托乃強起摒擋葬事久之姑亦惑於人言遂析其產兄尤齟齬不已孺人遂絕意戒口誦佛以杜其妄念初孺人受產甚沃外人恆爲覬覦卒爲某富商以計得去竟斬嗣孰意珠還合浦歟其兩姑之嫁也粧奩皆孺人置辦由是境窘迫孺人辛苦撫子處之泰然乙卯歲老姑以幼子殤因氣病歿停柩在堂孺人支身

昭通縣志稿

卷八

詩文徵

二十五

昭通新民書局代印

傍櫬經年喪葬如禮又以亮臣家中落舉姑之養贍產畀伊及樹勳授室生孫柱國孺人泫然曰二十年苦海天道使有今日耶現年六十樹勳力學有成每遇險化夷已生子五女四人咸謂天之酬節母如是其昭昭不爽也麟心儀母節迺綴其事而爲之傳

論曰死節易撫孤難古有定論矣蓋赴火蹈刃烈士優爲之若撫孤成立其難與布衣創大業等故有國恆旌其苦節使明禋綽楔彤管汗青有逾於爵位之尊貴者豈特不貳酬所天哉而世人乃以此爲庸行謬矣

宗弟彌青德配朱夫人墓表

嘉樂之詩美君子曰宜民宜人桃夭之詩美之子曰宜其家人宜者義之德而仁之作用也自非德備於心行成於身者誰能成己成人時措皆宜乎當今之時雖老師宿儒尙猶難之况在女子斯誼也不意竟得之於吾宗弟彌青之德配朱夫人抑亦奇矣夫人世系詳載墓志今特述其族戚所稔知者以見夫人之懿德淑行於家人無不相宜也清庚子年八國聯軍入北京其夫彌青有志救國欲赴東瀛留學因親老無人侍奉夫人毅然曰養親事我任之行矣何猶豫爲越明年翁疾篤夫人竭誠告天即割股以進彌青聞之泣云割臂之舉表示爲我盡孝也烏呼夫人之養親也是婦道而兼

昭通縣志稿

卷八

詩文徵

二十六

昭通新民書局代印

盡子道者也迨彌青學成歸來廿年奔走爲國宣猷全仗夫人代終之力夫人之相夫也是妻道而兼地道者也其子立言自父遠涉重洋夫人以養以教至十二歲即函促其父携赴北京求學旋送入美京大學習工科畢業後夫人聞之喜曰旣得探鑛冶金學士之榮暫勿回國可住美練習數年俾爲世用然則夫人之教子也是母道而兼師道者也嗟夫古人曰宣三德尙稱浚明况如夫人之六德咸備有不成夫成子庶績其凝者乎易曰輔相裁成天地之宜擴而大之聖人之德一宜也天地之德亦一宜也庸德之行其真難耶西哲有言何謂道德適宜人心之謂也哉尙已予故撮舉夫人

生平宜室宜家之大者勒諸貞石而表於墓道之側以作宗人之爲子爲婦者法

請棟發廣西知縣辛卯科舉人夫宗兄嘉珉敬撰

古今詩詞

擬陶淵明田居

魏定一 不波

扶杖行三徑縱目望平疇禾黍繞人家樹茂竹清修山水可怡情詩書能解憂田家無遠志只有稻粱謀引壺獨自酌浮雲任去留

讀陶淵明詩

山林鐘鼎道無殊五柳先生獨集枯洞外雲烟非漢魏廬中

昭通縣志稿

卷八

詩文徵

二十七

昭通新民書局代印

歲月有黃虞菊松靜愛香三徑印綬辭歸酒一壺隱士詩人都未是簞瓢陋巷信吾徒

九日登翠峯山

山岳不改歲月流九月九日上山遊憑高縱目古竇甸五城風景望中收龍山鬱鬱撐青空撲地村落雨烟中此地平來七十載牂牁仍還漢代風昔經雲中歷秦蜀天下名山相聯屬崎嶇萬里過梓潼異鄉佳節感心曲足跡未嘗遍海宇幾年登山懷吾土今年去家曾幾何陟山隕涕悲失怙童冠有情携菊酒插花歌吟有二叟嘯傲烟雲動天機油然各見胸中有落帽參軍意徜徉悲秋杜老詞蒼涼自古景物因人異

漫道從來此重陽茲山自古白雲封幾人高處寄行踪願與
同人空眼界年年來登第一峯

春風

元氣轉洪濛飄然至自東溫和噓海宇淡蕩破屯蒙拂柳參
差綠吹花次第紅天工誰第一八表頌春風

圓通寺

入天福地中萬象特玲瓏寺壓蛟潛穴幡搖雉堞風元明碑
自在滇蜀洞原通芝徑盤空上高僧覺悟同

滇南勝境

南滇第一境壤接夜郎西嶺壑留僧寺風雲趁馬蹄行來千

昭通縣志稿

卷八

詩文徵

二十八

昭通新民書局代印

里遠望去八荒低欲識山川闊寧徒羨紫泥

大關廳

重關山廓峻望近到來賒草屋雲煙上梯田嶺壑斜綠溪流
白雪翠壁峙青霞似是風塵外還過玩物華

重館西岳宮二律

爽然西岳宮披拂又春風草長叢叢綠花添樹樹紅知心真
舊友識姓有仙童小鳥偏嘈雜嫌人住此中

雲房詩尙在竹榻氣猶清犬吠前來客蠅飛早作聲眼青千
百輩鬢白兩三莖只有梁間燕依然不世情

登玉皇閣

傑閣凌空起登臨望不迷四圍千戶小八面萬峯低意擬青
霄上雲橫白日西清虛原可步仔細認丹梯

圓寶山

圓山圓月寶爲名下土圓通貯水晶桂殿蘭宮仙子宅瓊樓
玉宇道人情三春上已西湖景九月良辰北斗明境界三千
觀色相誰能覺悟見高濤

柳開含煙

即恩波樓
雷餘閣也

鳳凰山下沛恩波春煦秋陰變態多翠水盈盈搖古柳香風
習習長嘉禾樓如海市煙千縷渚傍漁舟雨一蓑有客樂山
兼樂水時時樹底聽謳歌

昭通縣志稿

卷八

詩文徵

二十九

昭通新民書局代印

五華山曉眺

五華山勢鎮全滇海水茫茫接遠天金馬欲驤霄漢路碧雞
還曜夕陽煙雲隈鶴侶巢高刹蓮渚漁人艤小船徙倚多時
星月上滿城鐘鼓自喧闐

昆明有感

金馬碧雞霽景新憑高意遠倍懷人螺蜂北望雲千里鳳嶺
南來日五旬綠竹嬋娟知氣味紅梅清潔見精神滇陽驛路
霏寒雪教向天衢探早春

讀徐思曠文

步月梅花下橫斜着淡粧閒中尋古意靜裏覺幽香

春日山行遇雪

野店雲容重溪橋雪意賒山村桃李樹聊當作梅花

扶風馬伏波祠

五溪馳羽檄戎馬動關河冷雨扶風路遙遙憶伏波

過可渡橋

翠雲堆處一川流界劃滇黔兩岸幽到此分明橋可渡無須
花下問漁舟

得勝坡懷古

將軍此處淨蠻烟故壘于今七十年漫道英雄同一盡綠苔
殘碣夕陽天

昭通縣志稿

卷八

詩文徵

三十

昭通新民書局代印

渭河

人生西行水自東洪波巨浪滿江風今看近岸礮溪石想見
橫竿一釣翁

夢詠李白六言

嗜盡詩琴酒劍閱周景物山川非關棄自明主只爲原來謫
仙

梅花

詞
東風第一枝

雪冷溪橋烟寒野店清奇只見松竹一番風信先來誰覺暖
回空谷冰枝鐵榦識天意陽梢芬馥任世間推作花魁猶是
淡然幽獨
唵翠羽夢魂趁逐眠皓鶴畫圖離陸水邊疏影

橫斜月下暗香靜穆題詩索笑儘憐惜孤芳潛伏待釀就麗
景韶陽好看萬千紅綠

菊花

金菊對芙蓉

陣陣金風湛湛玉露籬邊暗度幽香看莓苔小逕半倚松篁
憐渠與人瘦同樣卻不爭二月風光芙蓉對處秋容淡淡正
是重陽只有老圃疏狂自然閒采采詩滿奚囊不教金匝地
貯入壺觴餐英醉酒成佳話都因是性耐清涼人嫌隱逸未
知正色占斷秋光

竹 撼庭竹

嶰谷風流舊有名真萬古風清梅花得月助高情蘭花着露

昭通縣志稿

卷八

詩文徵

三十一

昭通新民書局代印

長新英猶讓此堅貞四序獨菁菁 石畔青松舊有盟無僅
慕虛聲渭川千畝意中生睢園一逕眼前明氣節信崢嶸韻
致更瓏瑋

松 風入松

蒼鬚老叟倚青空落落樹高風冰霜歷盡生鱗甲護烟雲翠
蓋重重聲撼半天風雨影搖百丈蚪龍 何欣入夢兆三公
不羨大夫封山中宰相栽庭院似淵明一逕菁葱謾謾真如
元禮蕭蕭亦葛洪

昭郡之亂

辛聯璋 朗山

叛亂世恆有撫御賴賢官安良首除暴暴除良自安近世托

招撫縱寇適養奸蔓延禍三池瘡痍忍淚看制府死能悟真
實剖心肝嗟彼凶頑衆蟻聚訝蜂攢燒殺百餘戶焦枯赤土
乾死者屍山積血流漲急湍生者馳道路恨未生羽翰子女
財帛盡萬戶苦凋殘虐焰施草木扑碑慘鑿棺世無韓范侶
誰登大將壇數萬餉虛糜練弱惜兵單堅僻持和議汪道朝盟
夕已寒賊首邀上賞軍功錫帶鞶猙猙殊種類怒目雄據鞍
分金恣衆飽虎豹馴爲難矯詐性叵測反覆滋釁端倉卒開
馬市禍實始仇鸞強者陷賊地赴役心力殫弱者遭鋒鏑骨
肉鮮聚完蕭條炊烟寂搜殺到層巒竄身伏荒洞不知天地
寬幸未填溝壑血汗刀劍瘢匍匐奔往訴怒責詞欺謾籲天

昭通縣志稿

卷八

詩文徵

三十二

昭通新民書局代印

高且遠萬里路漫漫藩籬陰盡撤冀結回人歡回有活佛號
漢作閻羅觀哀聲盈四野列鼎飽素餐衆恚填胸臆裂貫尙
桓桓誰實使之者遷恕及儒冠打期一網盡聞之鼻爲酸負
人勿負已斯語自阿瞞

哀王尙勳戰歿

昭城人俗呼王大老者帶練禦回有功以到白坡接糧陣亡前志有傳

斯人何可少當代一奇男氣作鷹揚奮躬經虎穴探青萍鋒
頓挫白刃蹈能甘星隕愁雲黯戈揮掠陣酣呼天身續百抱
恨矢遺三雖死猶生日英聲婦孺諳

題裴節婦夏氏

大義首乾坤夫婦立人紀詩詠矢柏舟風化自茲始夏氏有

令女許字名門子家道忽中落艱難奉母旨故鄉罹烽煙流
離悲轉徙計程六千里堂琅暫戾止夫壻客滇南蓮幕資贊
理儒生而請纓策名待筮仕馬革屍不還四郊多戰壘凶耗
自西來婦痛城崩杞絕粒以忍飢誓欲從之死姑老憑誰依
子幼將何恃殘喘寄餘生淚盡血凝紫鏡台屏鉛華織室謝
羅綺惟知從一終富貴浮雲視緬昔香閨賢芳徽光青史清
標貞婦詞苦節陶嬰里割鼻堪告誠毀容遽截指孤雁恥雙
飛激烈有爲此質比後凋松心是枯井水冰霜磨愈堅波瀾
寂不起彤管遠流芳永足振頽靡

慨時

昭通縣志稿

卷八

詩文徵

三十三

昭通新民書局代印

上下相蒙日天高聽遠何當權謀國少尸位負恩多害孰驅
蛇豕師徒擁鶴鵝軍書頻報捷奏凱不聞歌

山東道中

九點煙浮曙色開深秋遠自樸窩來霜凋落葉人材寂冷逼
寒衾客夢纔沙勢漫空沈白浪車聲撼石走晴雷憶經謫向
風塵後憔悴何堪首更回

題杜公部詩集

韓潮蘇海浪浮天子美詩才匯百川三賦宏深詞典麗七哀
悽惻意纏絲忌賢妄議讎嚴武憶舊何疑誚謫仙名士暢懷
多縱酒高人末路半參禪煙雲市近東西瀼貧病齋營八九

椽遙念京華空洒淚白頭流落楚江邊

過項王墓

咸陽一炬但煙浮力戰亡秦氣
劊劉指使八千皆子弟膝行
六國盡諸侯斜陽荒塚餘衰草
遺恨空江咽急流慢道錦衣
歸已悞猴冠貽笑楚人羞

戊戌春自滇赴燕途中有感

萬里孤身一劍存艱難蜀道石
為門界經吳楚江流闊路入
燕齊地勢尊帽影鞭絲繁客夢
丹楓黃葉醉吟魂壯懷不為
悲秋減壘塊頻消酒一樽

輓少司馬黃矩卿先生

道光丁酉舉人 呂清

昭通縣志稿

卷八

詩文徵

三十四

昭通新民書局代印

元宵燈火慘無春廿四朝驚逝哲人先生廿四日憤極昆弟憂

在國魂歸兜率望如神丹心共質成仁士謂華藕船廣文青史增光

仗節臣潘制軍暨府縣黃翟同日遇害何日西陲收殺運為公凝想一沾巾

枌榆懸車衣錦榮以戊申告養十餘年事畢陳情文章天上疑星象

武庫人間慟月卿縵自甘投心不死棺雖已蓋氣猶生全忠

全孝公何憾惟矢遺忱報聖明有遺摺需奏

大節完來自性靈蘭閨爭殉並芬馨先生側室周淑人羣愚枉用

騰誹謗正氣從知著典型執紼齊揮同里淚題碑合待鉅公

銘前賢論薛真成識徐中丞常與先生游黑龍潭論薛爾望節義事新塚纍纍草共青

忘分論交誼獨殷今當憑弔倍思君模糊入夢驚秋雨悽慘

同聲哭暮雲曾爲謀生多雅意再難欣賞訂吾文傷心忍負
生前愛尊酒哦詩抵欲云

紀王烈女絕粒殉夫

烈女東川人

讀史昔年羨伯姬今聞烈女更多奇曾經繡幕金絲繫尙待
蕭樓玉管吹雁影遽分傷命薄鸞棲失所使心悲呼天無計
成長恨此恨難言只自知
終身已屬孟家郎七日聊同賦未亡決意捨生盟井水甘心
矢死廢壺漿深閨獨灑英雄淚柔質偏餘鐵石腸此日城西
頻悵望青青雙塚鎖斜陽

如此捐軀最可憐流光方度及笄年霜摧頓覺芳華萎月暗

昭通縣志稿

卷八

詩文徵

三十五

昭通新民書局代印

難期破鏡圓恐累舅姑情慘怛爲憂父母語纏緜躊躇滿志
原無憾姓氏留香萬古傳

鐘山蔓海毓精靈弱女居然著典型氣似丈夫真磊落名存
閭里自芳馨門高綽楔榮旌表碑繞雲烟認石銘載筆史官
傳軼事合書節烈補遺經

和王春農太守由東移昭留別詩步原韻

日麗朱幡一樣紅新晴無復雨煙蒙

公祈晴
遇霽

休徵有象謳歌洽

善政頻敷德望榮

公歷任建水及首
縣首府皆有循聲

纔喜濃陰餘夏屋那堪別路

又秋風遮圍截鏡知何益民愛延韜本至公

其二

雅化將興泣任初窮經士子奮蓬廬
公下車即詣學講書並議書院課士松綠伴菊隨
心種莠爲傷禾帶葉鋤何武之官身講學景山行部雨隨車
從來吏事原經術臨去懸庭尙有魚

長安行即事

同治吳銀

旅宿長安店忽忽悲遠離夜聞小兒女隔院聲啞啞早起開
門看羣坐東階墀小者兩歲許大只十歲奇麻衣不蔽體葛
帔時露肌弟偃兄負曝妹牽姊啼飢嗒嗒如有待我見終懷
疑溫語就前問阿母阿爺誰一兒起對客羞怯澀言詞阿母
月前死阿爺忘所之室中惟一僕丐米去多時再問已不應
低頭淚滿頤僕歸呼與語衣垢面目黧欲前形覺穢未語淚

昭通縣志稿

卷八

詩文徵

三十六

昭通新民書局代印

先垂言是商家僕前歲始相隨主人京兆籍累代飄縷蕤乃
翁守山右居官如居奇爲子援新例需次蜀西陞參軍配新
婦成都良家姬十年足生育兩女間三兒俸輕家累重官罷
人情移去歲挈家返到此無旅資欲求將伯助苦爲弱小羈
暫假此間宿獨剩匹馬馳延安去不遠南轉向黃蘄去時與
婦約五月是歸期重九有書至又渡淮之湄迄今逾兩稔飄
泊在天涯吳市朝行乞秦廷夜哭師肝胆誰相向存亡皆未
知一自主人去主母獨支持有衣典已盡無米空自炊扶竈
饑兒泣搗門債主追眼穿心欲裂骨瘦病難醫九死不瞑目
三日尙停屍以是藐諸孤屬僕僕奚辭五口依爲命兩餐惟

爲作糜居停不忍逐時買餅與飴僕欲捨此去死者不可期
僕欲苦相待歸者尙遲遲僕言猶未竟我心搶以悲拊膺長
太息太息莫能爲解囊薄有贈信筆綴成詩用勸宦遊者毋
爲行路嗤

步雲墀夫子遊清官亭原韻

珠宮貝闕鎖城隈一叩禪關向晚開寶刹鐘隨清籟發蘭亭
客帶夕陽來身臨閣畔胸中闊興逐波心眼底催鼓浪浮游
欣見鯉羨登龍爾不凡材

水閣玲瓏映曲隈憑欄遠眺暮雲開蕭疏影裏抱琴至蕩漾
光中洗眼來畫意千端輕浪捲詩情一片夕陽催蒼蒼古木

昭通縣志稿

卷八

詩文徵

三十七

昭通新民書局代印

橫橋畔俯仰相期作棟材

重九登高前韻

歲貢 張 貫

諸君呼我齊登山我亦同君覽黛顏行近林深雲起處霓裳
好詠共追攀

蒼陰藹藹影重重缺處猶然露幾峯更喜飛鴻勤補綴霜毛
肯下湖中松

停杯高唱白雲邊響徹蓬萊路幾千此日乘槎拂袖去何人
不慕蔚藍天

數韻俱成日已曛錦囊有句燦晴紋伊誰送酒來酣飲醉伴
高松臥白雲

楊孝子歌

同治癸酉 西經魁 李開仁 樂山

同邑楊孝子聯吉捐軀殉親事在咸豐六年六月十二日同治辛未予主講鳳池其季燮吉執經門下爲予道其事甚詳余驚嘆久之命其具詳有司旌表其閭洎光緒丙戌余再主講鳳池楊生已舉孝廉乃以給諫鄧公承脩所敘事略及太守鄒公馨蘭詩見示且徵余言余旣嘉孝子之行並喜其季之能申其志也爰作歌以弔之其詞曰

龍山突兀天外撐龍潭澄澈寒且清中有孝烈楊氏子流傳婦孺皆知名伊昔孝子年十八天生至性確不拔咸豐丙辰六月中洪水灌隄恣洶刷父携孝子親往視水勢陵人肆傾

昭通縣志稿

卷八

詩文徵

三十八

昭通新民書局代印

軋浪頭洶湧迴避難父軀墮水子駭殺此時孝子惟痛親此時孝子遑恤身倉皇入水覓不得鄉里奔救置水濱可憐父死難覲面呼天號泣腸欲斷願拚一死葬魚腹求仁得仁夫何明陰風黯淡波臣泣蛟龍環顧咸慘戚只恐漂泊隨逝波夸父追日杳難及奇哉魂魄竟有知水中猶能尋父屍卒然抱父死不解須叟浮岸人盡癡由來鬼神示怪異血誠所感陰相之孝烈遠播徧京國鄧公之筆鄒公詩吁嗟乎古今何人能不死泰山鴻毛視所以誰料恂恂一儒生慷慨捐軀乃若此曹娥而下事罕聞吾於孝子見之矣

詠史

古有三不朽太上貴立德汪汪黃叔度雅量世莫測陳李矜
風節斯人獨沈默鳳凰翔千仞羅者猶藪澤天若假之年造
詣安可極高山興仰止保身吾取則

其二

羣小逐腥羶君子重氣節氣節豈不貴所憂過激烈瓊瑤投
瓦礫觸手多殘缺傷哉黨錮禍清流一網絕我聞郭有道識
時真俊傑浮游塵埃外高如蟬蛻潔又聞申屠蟠先幾獨早
決溷跡梁碭間皚如西山雪碩果此僅存正氣難泯滅自來
門戶分已甚胡可說茫茫青史恨唾壺擊欲裂

其三

昭通縣志稿

卷八

詩文徵

三十九

昭通新民書局代印

鹿門高尚士古有龐德公對字伊何人褰裳時過從沮溺偶
而耕蹤跡將毋同或嘉豈不偉失身鄙揚雄鸞皇翔寥闊俯
視笑蠛蠓卓哉管幼安皂帽客遼東存心亮茲異千載激清
風

其四

燒書始秦帝收書繼漢皇六經豈能滅瘕狗徒猖狂仰維鄭
康成墜緒尋茫茫獨力任箋注考据尤精詳譬彼日月蝕終
古常輝煌若令在孔門入室同升堂通德署其門異類安敢
傷似聞黃巾賊尙避鄭公鄉

其五

孫登避世事高隱蘇門山有聲若鸞鳳響振巖谷間斯人空
魏晉長嘯出塵寰嵇康不自量輒與談幽元身在網羅裏焉
能脫籬樊才疏而識寡免世良獨難去去莫相溷煙霞且閉
關

其六

邈矣陶徵士高懷吾所師盤桓撫孤松清節想見之田園尋
真樂一一形諸詩蕭然林下風洗盡鉛華姿抗志羲皇上素
心終不移徒云甘澹泊相馬但以皮古人如可作庶與證襟
期

其七

昭通縣志稿

卷八

詩文徵

四十

昭通新民書局代印

黃冠多荒唐緇流尙寂滅大道伊誰肩遠惟邵康節內聖外
王學允推古豪傑苞符啟祕緘河洛窮鉤抉橋畔杜鵑聲氣
機獨早決靖康未北狩當時已烏咽荆公變青苗名流思歸
潔謂能寬一分何憂新法烈不可爲而爲宣尼心若揭同類
豈無賢洛蜀徒爭別太息三黨碑姓名千載列

其八

元綱日陵替君子見幾作蕭閒古仙卿

按倪元鎮自號雲林生又稱朱陽館主蕭閒仙卿

軒

軒雞羣鶴誰云迂且傲此身甘寂寞雅抱出塵姿一生好邱
壑五湖三泖間扁舟任飄泊豈無萬金產棄之猶敝屣皎然
泥不滓圖書日尋樂偶寫隔江山煙靄筆端落聊詠白雲篇

心事短章託武林張伯雨交情契冥漠高風溯千載神往清
閼閣

秋館夜半忽聞風雨攪林雷電交作獨客淒然感賦一首

竟夕不成寐風雨滿林薄雨雜風颼颼風定雨猶落有時雨
點大打門聲如柝狂風捲地來勢欲拔松籜迅雷藉風威鐵
騎憑空搏倒翻江海水山靈皆震愕五更風雨收輕寒透羅
幕攬衣起開門萬籟虛無著遙聞古寺鐘清聲度高閣

讀南華有感

昔聞曲轅陰上有百圍樹以爲舟則沈以爲柱則蠹棄擲在
深山匠石走不顧賴此全天年風雲常擁護豈無棟梁材森

昭通縣志稿

卷八

詩文徵

四十一

昭通新民書局代印

森植當路一朝縱斧斤中道忽顛仆感茲長嘆息深情那可
訴我心自閑閑胡爲利名錮我才碌碌碌胡爲櫻世務浮生
三十載翻恨昨非誤田園歸去來漁樵斷塵鷺一葉駕扁舟
搖搖柳陰渡黃鸝四五聲引入最深處推篷臥看山松梢猶
帶露清泉道心曲折竹等閒度空林踏月歸題詩聊自注不
假雕琢力絡繹多佳句藉此忘衰朽尋艱窮朝暮且學彭澤
宰勝讀閒居賦悠悠何所營紅天飛白鷺

咸豐七年冬間奉母避居大關石嶠嶴數月土匪嘯聚道梗

不得歸感賦一首

故鄉遭離亂爰向他鄉移他鄉復如此此身安所之昔與老

父別一路多驚疑計程四百里十日以爲期到關未數月漢人忽滅夷滅夷豈無罪勦撫貴得宜卒然招外寇報復反有辭拒虎而進狼伊戚果孰貽時官吏招回匪以攻漢土匪爲練用因乘機而起至今羣盜起紛紛踞熊羆高堂拋不得妻子胡忍遺瞻烏靡所止問天天不知披衣起中夜苦衷將告誰

舟泊松滋率子嘉瑞回籍喜見族譜以詩紀事用誌欣幸

滇南有歸客萬里駐行舟言尋斗山寺特向松滋留呼兒邀勝友竝轡穿林陬時維冬十月麥苗紛盈疇岡巒非一狀水石含清幽松聲引馬足紆折開心眸計程六十里倏抵莫盤州入市問同姓歷歷話前由始祖離茲土遠向昆華游曲陽

昭通縣志稿

卷八

詩文徵

四十二

昭通新民書局代印

及昭郡九葉垂箕裘興亡閱兩代二百五十秋上溯所自出家乘恨未收竭來凡幾度夙志今當酬吾宗兩茂才出譜任探搜名氏與朝代按圖俱可求乃知松滋派源自吉水流四傳吾始祖南遷若綴旒伊譜云失傳吾譜實肇脩脈絡本分明儼如針芥投散處天一方何異水中鷗撫茲長嘆息闌干淚不休詣祠爇瓣香匍匐陳庶饑區區尊祖心昭假諒無尤旁觀驚感歎此事非人謀不然時地隔孰與證從頭昆弟招予宿竟夕頻諮諏落落清軒志國忠字清軒謙宴深綢繆娓娓丹臣情紹勳字丹臣款洽意良周努力各自愛勿貽前人羞明朝更分手

煙波江上愁

四思

我所思兮在漢陽美人遙隔天一方欲往從之無舟航蒹葭
白露變爲霜孤帆巫峽下瀟湘吳頭楚尾遠相望江流浩浩
山蒼蒼春風秋月神飛揚澧蘭沅芷同芬芳星離雨散徒徬
徨思而不見神慘傷其二

我所思兮在昭陽高堂八十鬢如霜欲往從之道阻長曾隨
鴛鴦朝天閭水曹人呼七品郎歸來輒廢蓼莪章鳳鳥分飛
失其凰鴻雁哀鳴謀稻梁有鷺在林鶴在梁抑塞磊落結中
腸思而不見淚淋浪其四

送和將軍耀曾曹將軍世貴奉調西征兼贈妹倩涂將軍

昭通縣志稿

卷八

詩文徵

四十三

昭通新民書局代印

開科

櫂槍掃盡妖氛清蛟窟血翻鯨浪平甘黔小醜何足慮况乃
饜足兵復精君不見昔年征戰苦枵腹從軍淚如雨東人歡
笑西人哭可憐鬧市成焦土岑公忠義激蒼冥士卒感奮猛
於虎就中我識和將軍豪氣勃勃干青雲威名突過楊無敵
韜鈴不數馬服君幽燕老將更沈雄輕裘緩帶何從容雅歌
投壺今已矣風流誰弗羨曹公吾家妹壻尤英武大度恢廓
少儕武三人交好無嫌猜相期報國破殘虜羽書昨夜赴昭
陽天末風起雲飛揚將軍含笑點兵籍旌旗閃爍日無光日
光摩盪陣雲黑敵人望氣渾如墨兩公號令肅秋霜會看八

戰定八克大軍朝拔龍尾關單騎夜入鄴圍國涂君安坐休
局促師行前後還相屬誓將洱海千頃波盡洗廿載腥臊辱
吁嗟乎沙場辛苦莫辭勞英雄萬古推鄂襄功成同繪凌煙
閣勳名直共點蒼高

輓楚撫胡文忠公林翼

一著爭先取鄂州屹然重鎮固金甌軍分水陸操成算力捍
荆襄據上游擐甲頻傾諸將淚呼庚常切盡臣憂吳中逋寇
何時滅九仞功虧恨未休

聞曾制軍收復金陵

天戈指日靖櫓槍力挽狂瀾一柱擎白下鯨鯢爭授首南中

昭通縣志稿

卷八

詩文徵

四十四

昭通新民書局代印

草木盡知名人鍾衡嶽英靈氣威振湖湘子弟兵聞說橐鞬
迎道左相公親入蔡州城

詠唐梅

千秋誰守舊精魂老榦婆娑尙有根試問孤山林處士渠家
少婦總兒孫

游龍洞

溪山不管紅塵劫兵燹長留屋數椽鎮日壺觴拌客醉摩崖
詩句笑誰鐫浮雲莫問人間世流水憑參洞口禪夜半高歌
獨慷慨一聲驚起老龍眠

恭頌岑中丞彥卿先生擒斬杜逆鏡歌

雄師一夕擣龍關壯士銜枚令若山捲甲齊驅三十里平明
奪得蔡州還

其二

十萬貔貅細柳屯將軍怒馬出轅門陣前巧試屠龍手提出
頭顱酒尙溫

龍尾關題碑和鄧子龍原韻

摩娑石碣訪舊聞龍尾關前日又昏二十萬軍同一塚可憐
多少未歸魂

魚麪腸

謝文翹 秀山

引杯看劍興淋漓竟有別腸佐酒卮鮮潔形疑調玉屑清腴

昭通縣志稿

卷八

詩文徵

四十五

昭通新民書局代印

味勝膾銀絲豹胎熊掌珍都遜馬墨牛黃病亦奇寸斷幾廻
仍嬾動加餐尺素慰相思

圓寶山

己卯 饒起孝 性初 舉人

我聞龍漢初媧鼎金砂擣何年朱汞

丹砂所化 爲水銀也

飛墮地圓成寶

天地爲洪爐陰陽工鑄造鍛鍊雷斧施烹煎神釜妙鑛盡真
金出潮退靈液老圓虹盤深圈大模如栲栳珠凝色相呈窠

白乃傾倒一鋌置南方丙火資薰燎濟以乾河水

在山之南

坎離配

合巧浴日色

睽睽

鏡月輝皎皎中凸邊四垂底平頂圓好花

紋苔縷皴眼窠石縫窅風雨磨山骨精光燭天表乃引鳳象

來

鳳凰山在山之西 象鼻領在山之東

逐逐門嘴爪象吞鳳距拏鳳攫象鼻拗兩爭兩

不得東西相拱抱北極宮其巔生金水制燥龜蛇時巡行魑
魅敢侵擾香市春月三求利神爭禱洞門金穴開福地球塵
掃拋毬無黃師銜環來青鳥球琳燦瓊宮珍奇羅瑤島瞻彼
銀坑深笑他銅山小將欲輕重權銖兩萬億兆嗤嗤下山氓
錐刀競微杪一角分零星萬室足溫飽買春春長留富人人
壽考大元鎮邊隅利賴子孫保積善慶乃餘惟賢儲宜早爲
語持籌人勿憂國用少

清光亭讌樂寄石甫

西風吹柳線送我步城陰古寺尋鐘入春潭一水深雲山鄉
國思冰壺故人心花外沽新酒清尊豔賞音

昭通縣志稿

卷八

詩文徵

四十六

昭通新民書局代印

四月廿八日午驟雨大雷電以風感而有作

陰霾翳天天無色癡雲貿貿團深墨方圓結陣相膠漆日中
倏變夜昏黑霹靂震驚雷鼓鳴屏翳豐隆紛鬪爭飛廉方逞
撼山怒河伯更挾天瓢傾我疑妖物弄狡獪帝遣童律誅羣
怪又疑老姦惡貫盈雷霆律令風火行或是毒龍羣鬥天含
沙噴水攫雲煙飢蛟怒起挾山走百千丁甲揮椎鞭四者俱
非非無故人心不平天始怒特教迅烈警愚頑明明法戒森
昭布水旱頻年救災皆惡劫收人人不醒人心向善天心回
詩以儆人還自儆

還家

白髮孀親老青衫遊子歸那堪鸞鏡破重以雁羣飛嫠婦悲
同氣胞妹二均守節待旌孤雛唁落暉亡室遺女亦夭風塵餘廿載回首是耶非

祭張快園廣文

公鎮雄舉人官白鹽井訓導因衛聖死於回難

黃道清

不負胸中學成仁已殺身乾坤留正氣忠烈見斯人嚼舌噴
龍逆捐軀邁虎臣至今宮藻下血迹未生塵
儒生臨大節慷慨自超羣逃避嗤諸武忠貞慕廣文身衣鄒
氏宅血濺魯侯芹食粟人多少如君未易云

夏日輓耿秋圃

小別何期竟永辭訃聞更使淚如絲招魂剩我遙爲祭展墓
誰人再賦詩白馬素車悲撒手青山紅樹總相思西林無限

昭通縣志稿

卷八

詩文徵

四十七

昭通新民書局代印

傷心事話到泉台知未知

卍角當年憶執經推敲險韻費丁寧春蘭結契因文字夏雨
懷人悵渺冥石窟虛營安樂宅玉樓竟詔少微星高山流水
成終古譜入冰絃忍卒聽

存心歌

處世貴和平立身貴恭儉孝弟及信行隨時加奮勉誰云湖
海深水清魚自見誰云巖壑高山明霧自斂惟有世人心恍
惚不可辨吁嗟乎萬物最靈惟人心收兮莫放自無侵比干
七竅誰能及鐵石叢中仔細尋